

Date – 24/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. An chairman Dr. Arvind Panagariya hova Finance Commission 16-na member-te chuan nimir khan ni 3 cham turin Aizawl an rawn thleng.
2. Mizoram tlawha lo zin mek 16th Finance Commission member-te leh Chief Minister leh a thawpuite vawin khan Aizawl an inkawm.
3. Prime Minister Narendra Modi chuan vawin khan Global Investor Summit, Bhopal ah a hawng.
4. Vijender Gupta chu Delhi Assembly Speaker atan thlan a ni.

<><><>

16TH FC IN AIZAWL

Mizoram tlawha lo zin mek 16th Finance Commission member-te leh Chief Minister leh a thawpuite vawin khan Secretariat Conference Hall, MINECO-ah an inkawm a,

Chief Minister Pu Lalduhoma chuan an inkawmna hian Mizoram tan hmachhawp duhawm leh hmakhaw eng tak a siam phah ngei a beisei thu a sawi a. Mizoram leilung zau zawng za zela 84 chuang chu ram ngaw in a tuam thu sawiin leilung hausakna, thing leh mau leh nungchate chenna hmun pawimawh tak a nih bak ah boruak thianghlam petu leh sik leh sa inthlakthleng nasa lutuk tur vengtu pawimawh tak a nih thu a sawi a ni.

Pu Lalduhoma chuan Mizoram chu tribal hlang deuh thaw chenna, kut hnathawh a inngat tamna State a ni chungin India ram ah ziaik leh chhiar thiam tamna State a nih bawh thu a sawi a. Amaherawh chu ram leilung pianhmangin a zir loh avang a inkalpawhna kawng a harsatnate, hmanraw man sang avangte leh Industry lian behchhan tur a awm loh avangtein hmasawmna ruangam duang tur chuan Sawrkar laipui puihna a tul fo thu a sawi.

Chief Minister chuan Mizoram sawrkar sum lu za zela 83.56 bawh vel chu Tax Devolution leh Grants-in-aid a nih thu sawiin za zela 16.77 vel chauh State chhung atanga hmuh a nih thu a sawi a. State dang a thleng zen zen lo, khuarel chhiatna leimin, ram kang, tui lian leh ruahtui tam vang a harsatna thleng thin te chu Finance Commission chuan a ngaih pawimawh sak a tul thu a sawi.

He hunah hian 16th Finance Commission atangin thalaite thiamna leh theihna (Skill Development) tih pun a nih theih nana rawtna te, Mau hman tangkai leh zual dan ngaihtuah tur a rawtna te, Nursing school leh College changlung kalpui zel tur a rawtna ngaihthlak a ni a. Mizoram sawrkar atanga

rawtna hrang hrangte chu an zirchian tur thu sawiin Mizoram sawrkar ina an lo dawnawn dan chu lawmawm an tih thu an sawi. 16th Finance Commission-te hian India ram State hrang hrang zirchianna hi kalpui mekin State 18 an tlawh kual tawh a, Mizoram hi State 19 an tlawhna a ni.

16th Finance Commission atanga lo kalte hi Chairman Dr. Arvind Panagariya bak ah member dang Pu Ajay Narayan Jha, Pi Annie George Matthew leh Dr. Manoj Panda-te niin, official pawimawh dangte'n an rawn tawiam baw a ni.

Vawiin vek kha thuthar thehdarhtute kawmin 16th Finance Commission Chairman Dr. Arvind Panagariya chuan Mizoramin ei leh bara hma a sawn theih nan a ram leilungin a ngah sa, mau hman tangkai a pawimawh tih a sawi.

Akashvani corr zawhna chhangin FC Chairman chuan mau chu company thenkhatin bungraw siam nan ber an hmang a, Mizoram leilungin a ngah sa mau chu heng company te hian an lei duh ngei ang a ti a, Mizoram chu infrastructure ah ala hnuful em avangin mau techu sawngbawl zung zung a la harsa a, Hemi kawnga hma la tur hian Mizo entrepreneur te an pawimawh hle a ni a ti. FC Chairman chuan ram ei leh bar, sum leh pai leh chhiah hman tangkai dan hrang hrangin hma a sawn theih nan state danga an tih ang bawkin Mizoram sorkar rawnin an lo zin tih a sawi a. Finance Commission chuan thingtlang leh khawpui chhunga tualchhung inrelbawlina, chhiatrupna thlen thulha sum hman tur bakah damdawi inenkawlina leh zirna atana hmasawnna hnathawh hrang hrang atan sum an pekchhuah thin thu a sawi baw a ni.

<><><>

FINANCIAL LITERACY WEEK 2025

Reserve Bank of India buatsaih, Financial Literacy Week chu “Financial Literacy – Women’s prosperity” tih thupui hmangin vawiin khan Larsap Gen (Rtd) Vijay Kumar Singh chuan a hawng.

Larsap chuan Financial Literacy Week buatsaih ani chu lawmawm atih thu sawiin Sum leh pai enkawl dan dik hriat tawh loh avangin harsatna hrang hrang a tawh theih a ti a, Tunlai khawvelah UPI hmangin pawisa inpek a awlsam tawh a, hemi avang hian pawisa ip atanga pawisa phawrh kherlo in tam tham tak pawisa a hman theih tih hriat a tha a ti a, Sawrkar laipuiin kum 2047-a ram hmasawn a nih tumna – Viksit Bharat ah pawh sum leh pai enkawl dan dik hriat hi ngaih pawimawh ani tih sawiin sawrkar laipui pawhin mipui ban phaka awlsam turin thil hrang hrang a buatsaih thin tih a sawi.

Larsap chuan hmeichhia ten Bank account an neih theih nan leh anmahnia sum an khawl theihna tur hrang hrang sawrkarin a ruahman a ti a, mipui mimir hmasawnna chu sawrkar ngaih pawimawh ani tih sawiin hemi ti hlawhtling tur hian Mizoram state chhunga Bank leh Financial Institution zawng zawngte chuan mipuiten Bank an dawr vek theih dan turte, beisei awm ten sum peipun dan leh an khawl theih dan tur kawnga kawhhuu ni turin Bank hrang hrang te tan la turin a sawm baw.

(Byte...Governor...43 secs)

Pu T. Lhungdim, General Manager leh Officer-In-Charge, RBI Aizawl chuan Kum 2016 atangin RBI chuan Financial Literacy Week a hman thin thu sawiin hengah hian tum bik neiin, thlan bik mipuite zingah an mamawh zirtirna an pek thin thu a sawi a, a tum ber chu campaign chhunga inzirtirna pek tur bik thupui siamte chu mipuite zinga a tam thei ang ber thehdarh a nih thu sawiin RBI chuan tunkar chhung hian sum leh pai inzirtirna tur thlanbik thupui hmangin theihtawpin Mass Media Campaign hmangin inzirtirna hi a thehdarh dawn thu an sawi baw.



AIZAWL DAY

Ni 3 chhung Aizawl Day lawmna naktuk khian tan a ni dawn a, Aizawl Municipal Corporation (AMC) bultumin naktuk chawhnu dar 2:30 ah Aizawl Sipai lammual ah hawn a ni anga, Aizawl Mayor Pu Lalrinenga Sailo chuan a hmanpui ang. Mayor hian he hun chhim tur hian mipui a sawm nghal bawk.

(BYTE)

Aizawl Day lawm chhung hian intihhlimna chi hrang hrang a awm dawn bakah, Mizoram zaithiam lar tak tak te an zai dawn bawk a ni, he hun ah hian Exhibition chi hrang hrang en tur leh lei tur bakah eitur chi hrang hrang zawrhchhuah a ni ang.



LEGISLATORS MEETING

MLA ten HIV/AIDS lama hma an lakna tur committee sang, Mizoram Legislative Forum on AIDS chu vawiin khan I&PR Conference Hall-ah Health Minister Pi Lalrinpuii kaihhruaiin an thukhawm a.

Pi Lalrinpuii chuan HIV chungchanga Mizoram dinhmun chu mipui nawlpuiin an vei a tul tawh zia sawiin, Legislator te pawhin tun aia nasaa hma an lak a pawimawh tawh tak meuh a ni a ti a. India rama HIV hluar dan chu zaa 0.2 anih laiin Mizoramah chuan a sang ber niin a hluar dan chu zaa 2.73 a ni tih a sawi.

MSACS Project Director Dr. Jane R. Ralte chuan Mizoram ah January 2025 thleng khan HIV kai mi 32287 hmuhchhuah an ni tawh a. He natna avanga thi hi hriat theih chinah 5511 an tling tawh a ti a, nikum 2024 April leh kumin 2025 January chhungin HIV 1769 hmuhchhuah an ni tawh tih a tarlang bawk.

MSACS Project Director sawi danin, Nikum April leh kumin January inkara HIV kai thar hmuhchhuah zat atanga za zela 67 chu invenna tel lova sex hman atangin a ni a, hriau thlianghlimlo inhmantawm atanga kai hi za za zela 30.44 an ni. Mizoram chu HIV natna avanga hun engemaw chen a thalo zawngin langsar mah se, tunhnaiah hmasawinna hmuh tur duhawm tak tak a awm ve zela, natna hrik kai thar an tlak hniam bakah he natna avanga thi nasa takin an tlem tawh a ni.

Health Minister hova MLA leh MSACS aiawh thenkhatte inkawm khawmnaah hian mahni inringhlel te tan thisen test thuai a pawimawh thu leh hrisel tha pangngai taka awm nan ART damdawi ei uluk a tul thu sawi a ni a. HIV darh zel tur venna kawnga pawimawh tak Drop-in-Centre mumal taka hman tangkai leh theih dan turte rawtna siamin sawho a ni a.

MLA te hian HIV darh zel tur dona kawnga tha thawh an inhuam thu sawiin, kum 2024-2025 chhungin MLA fund atangin cheng sing 5 theuh HIV hrik kai ten chatlak lova ART damdawi an lak theih nan, ART panna tur senso atan MSACS hnena hlan an remti bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan ni hnih cham turin vawiinah Assam a tlawng dawn. PM Modia hian Guwahati-ah Jhumoir Binandini Programme a hman dawn a. Advantage Assam 2.0 Investment and Infrastructure Summit naktukah a tel dawn bawk a ni.

Jhumoir Binandini Programme hi Sarusajai stadium ah neih tur niin he hunah hian thingpui huan enkawltu tribal hnam atangin mi 8500 chuangin Jhumur lam an entir dawn a ni. Vawin tlai vek hian PM Modia hian Advantage Assam 2.0 Summit atana exhibition a hawng dawn bawk a ni..

<><><>

DELHI

Vijender Gupta chu Delhi Assembly Speaker atan thlan a ni. Vawin khan sawrkar thar siam anih hnuah Delhi Assembly thutkhawm hmasa ber neih a ni a. He hunah hian Chief Minister Rekha Gupta a cabinet member Pravesh Sahib Singh, Ashish Sood, Manjinder Singh Sirsa, Kapil Mishra, Ravindra Indraj Singh leh Pankaj Singh te chuan MLA ni turin rinawmna thutiam an la a. Anni bakah hian MLA thlan tharte pawh lakluh an ni bawk a ni.

Vawin Assembly thutkhawmah hian Rohini MLA Vijender Gupta chu Speaker atan thlan a ni. Naktukah session chhunzawm a ni ang a, Lt. Governor Vijay Saxena chuan thu a sawi dawn a. Ni thum awh tur Delhi Assembly Session hi tun thla ni 27 thleng neih a ni ang.

Puan tawh angin Delhi Assembly inthlan neih zawh takah khan BJP chuan seat 70 ah seat 48 ah hnehan an chang a. Aam Aapni Party chuan seat 22 an la thung a ni.

<><><>